

466


B

79



Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
400 8 79







Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
466 B 79



Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
466 B 79



Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
406 B 70



JOANNIS GREVII
ORATIO
INAUGURALIS
PRO
SCHOLIS,

Habita Groningae pridie
Nonas Apriles c13 13c xcv.



GRONINGÆ,

Apud CORNELIUM BARLINCK-HOF, Civitatis
Groningæ Ordinarium Typographum; Anno 1695.



ILLUSTRIBUS, ET PRAEPOTENTIBUS,

V I R I S,

INCLYTAE REIPUBLICAE

GRONINGANAE

CONSULIBUS,

ET

SENATORIBUS,

PATRIBUS PATRIAE,

S. P. D.

JOANNES GREVIUS.



fficii religio, beneficiorumque Vestrorum erga me magnitudo, quibus me, Patres Amplissimi, non ita pridem obstrinxistis, excitant me

A 2

per-

DEDICATIO.

perpetuo, atque impellunt ad quas-
cunque gratae voluntatis, quas pro
mea facultate dare possum, signifi-
cationes edendas. Non tantum enim
mihi celeberrimas Vestras Scholas
regendas commisistis, & tam ampla
proposuistis praemia, ut neque ho-
norificentius quicquam, neque li-
beralius fieri potuerit; verum etiam
advenientem recepistis omni genere
humanitatis, comitatisque, ac nulla
interposita mora extra ordinem me
civitate donastis, atque eodem ha-
buiſtis loco, quo optimarum artium
Professores, nec non eos, qui hic
divina mysteria pro concione inter-
pretantur, habere soletis, quo nihil
ad meam dignitatem amplificandam
majus, nihil excellentius potuit con-
tin-

DEDICATIO.

tingere: neque unquam apud me
tantae benignitatis, ac beneficentiae
memoria consenesceat. Nolite igitur
mirari, Patres Amplissimi, aut
mihi succensere, quod orationem
hanc meam inauguralem, quae jussu
Vestro divulgatur, Vobis inscribere,
& tam tenue munusculum Vobis
offerre sustinuerim. ardeo enim in-
credibili cupiditate inusitatum Ve-
strum & prolixum in me amorem
quavis occasione grato praeconio
celebrandi. Utinam mihi tam beni-
gna esset ingenii vena, ut dignas
Vobis pro tantis Vestris in me meri-
tis gratias referre possem! cognosce-
retis sane me omnium gratissimum:
sed cum hoc non sit opis meae, con-
fugiendum mihi est, quo solent,

A 3

quo-

DEDICATIO.

quorum egregiam voluntatem destituit facultas. Magis me illud sollicitum haberet, nisi spectata Vestra animi altitudo atque excelsitas a meae sortis hominibus nullam aliam expeteret gratiarum actionem, quam gratam memoremque beneficiorum mentem, ac in iola de iis, qui litteris humanioribus sese dederunt, bene merendi voluptate acquiesceret. Notum est enim, atque apud omnes pervulgatum, nullos in fovendis ingeniis, & disciplinarum praestantissimarum cultoribus ornandis, ab omni tempore Vobis aut pares fuisse, aut secundos. cuius rei laudes sempiterni annales decantabunt, & vetustatis monumenta loquentur. Quamvis autem haec Vestra

DEDICATIO.

stra de mea oratione publicanda voluntas haud obscure ostendat, illam, quam benignis accepistis auribus, Vobis non omnino displicuisse, si meo tamen animo mihi potius licuisset morem gerere, quam Vestrae auctoritati, a qua dissentire nobis piaculum est, nunquam eam passus essem prodire, veritus, eam tanti non esse, ut eruditorum virorum calculum posset ferre, & eorum effugere reprehensionem. Longe igitur multumque praestare, mihi persuasissem, eam in tenebris delitescere, quam in luce versari, atque prudentium subire iudicium gravissimum. Sed cum Vobis ita placuerit, malui meam existimationem periclitari, quam Vestra detrectare iussa,
ad

DEDICATIO.

ad Quorum arbitrium & nutum me
totum sic accommodo, ut ea tantum
mihi & recta, & aequa, & optima
videantur, quae Vos imperatis, sola
obsequendi gloria contentus. Quis
enim Vestra recusaret imperia, qui
nihil praecipitis, nisi quod honestum
est, quod legitimum, & parentibus
utilissimum, ac saluberrimum? qui
publicas res privatis Vestris com-
modis & rationibus praefertis? de-
nique qui omnem operam, omnem
industriam, omnem cogitationem
in Urbis, civiumque Vestrorum,
salutem, felicitatemque confertis, ac
locatis? Ne dicam de religione, qua
nihil praestantius a Deo concessum
est humano generi; & de praeclaris
artibus, quibus homines ad magnae
fortunae cultum formantur; quanta
cura

DEDICATIO.

cura ac diligentia in id continuo incumbitis, ne quid de illarum dignitate ac incolumitate detrahatur! Tuendae ac conservandae libertati, Vobis a majoribus traditae, stupendum in modum studetis. hac Vobis nec pretiosius quicquam est, nec jucundius, nec fructuosius. pro illius itaque custodia nunquam non excubandum, & si necessitas flagitet, ferro decernendum, ac vitam ipsam profundendam esse censetis. quarum rerum jam saepius notissima dedistis documenta. Rempublicam Vestram sic constituistis, ac descripsistis, ut nullius diligentis & attenti patrisfamilias privata domus pulchriori ordine & dispositione possit regi, quam illa a Vo-
B bis

DEDICATIO.


bis administratur. Hinc est, quod
valeant cives Vestri, quod incol-
lumes sint, quod sint florentes,
quod numerentur inter eos non
pauci viri, cum foris clari, tum
domi admirandi. Hinc summum
otium, maxima frugum ac fructu-
um ubertas, omnium rerum, quas
natura desiderat, abundantia & co-
pia: hinc artes ingenuae ac libera-
les, mercaturae, varia opificia in
Vestra urbe vigent, ut jure ac me-
rito quis dixerit, ibi & natam esse,
& altam rationem ac moderationem
vitae. O fortunatos Groninganos,
si sua bona norint, quibus circum-
fluunt & abundant! Sed quo dila-
bor? Non enim fert animus cum
maxime in Vestras immortales ac
illu-

DEDICATIO.

illustrissimas laudes excurrere, & in hunc latissimum evagari campum, utpote quas non completuntur breves hae pagellae; verum rejiciam hoc in aliud tempus, quo mihi aptior erit atque amplior de iis differendi locus. Quod reliquum est: Vos oro atque obsecro, Patres Amplissimi, ut, pro Vestra humanitate insigni, eodem vultu, eademque benevolentia orationem meam, nunc typis descriptam, excipere dignemini, qua praesentes illam audivistis. Quod si feceritis, eamque habueritis pro indicio, ac pignore perpetuae meae, ac constantissimae in Vos observantiae, pietatis, obsequii, ac venerationis, qua Vos prosequor, omnia mihi data esse

DEDICATIO.


esse existimabo. Deus ter Optimus
faxit, uti beatissima Vestra respublica
floreat seculis innumerabilibus; uti
quotidie magis magisque coalescat,
ac corroboretur; uti Vos illam diu-
tissime bene ac feliciter geratis, ac
laeti bono publico sitis superstites;
utique nos quam maxime possimus
prodesse juventuti, quae a Vobis,
Vestrisque civibus nostrae fidei cre-
ditur; Vos vero beneficia Vestra
non male posita esse semper gau-
deatis. Etiam atque etiam valete.
Groningae a. d. xiiii. Kalend. Maj.
CIO IOC XCV.



JO-

JOANNIS GREVII
ORATIO
INAUGURALIS
PRO
SCHOLIS.

AMPLISSIMI, GRAVISSIMI, DUUMVIRI
SCHOLAE CONSTITUENDAE CAUSSA,
CONSULES, AC SENATORES, RELIQUIQUE
HUIUS REIPUBLICAE PROCERES POTEN-
TISSIMI, PATRIAE PATRES, RELIGIONIS,
VIRTUTIS, DOCTRINAE, CUSTODES: PRO-
FESSORES, QUA QUISQUE LAUDE, ET
SCIENTIA, CENSETUR, CLARISSIMI: RE-
VERENDI VERBI DIVINI PRAECONES:
DOCTISSIMI OMNIUM DISCIPLINARUM
DOCTORES: COLLEGAE HONORANDI:
CIVES, INCOLAE, HOSPITES, CUJUSCUN-
QUE ORDINIS, AETATIS, AC DIGNITA-
TIS, ORNATISSIMI.



Raeclara, atque excellentium virorum
monumentis celebrata fuit Veterum
consuetudo ac institutum pristinum, si-
cut omnium magnarum rerum ita di-
cendi principia a Numine quodam & precationi-

B 3

bus

bus trahere , utpote qui sibi persuadebant , nihil rite , nihil caste , nihil prudenter homines sine Deorum immortalium auctoritate , auxilio , honore auspicari. Qui mos eximius nullis natorum hominum aequae ac nobis convenit , aut est ad imitandum expositus : quippe qui non conflictamur vana superstitione , & anilibus fabulis , neque in magnis paganorum erroribus versamur , ac tenebris , sed densa nube discussa ipsius Dei beneficio ex opaca caligine in lucem divinae sapientiae ac veritatis emerimus. Illi colebant inanes statuas ac pueriles imagines , quae neque audire eorum preces poterant , neque opem ferre indigentibus. Nos imploramus summum , ac verum Dei Numen , quod viget , quod sentit , quod meminit , cuius nutu cuncta gubernantur : quod succurrere afflictis , quod petentibus veniam dare & potest , & non dubie ac benignissime daturum promisit. Quum itaque in hoc theatrum Scholasticum , tanquam liberalium artium mercatum , secunda Amplissimorum Patrum suffragatione sum productus , ut cupidae juventuti pretiosas Musarum merces deferrem , cumque mihi tantae molis , tantae expectationis , ac laboris tam ardui munus sit mandatum ; quid aptius erit , quid praestantius , quid ad pietatem magis ac-

commo-

commodatum, quam in hac inaugurationis meae
fesiuitate, levatis in coelum manibus, primo
Deum ter Optimum ter Maximum ardentissimis
sollicitare precibus, ut honestis ac piis coeptis
adspirare non dedignetur? Te igitur Pater Omni-
potens, rerum Sator, orbis terrarum Conditor:
Te Aeterne Fili, humani generis prostrati, ac misere
perditi Assertor, ac Servator: Te Sancte Spiritus,
tristis ac conturbatae mentis humanae Consola-
tor, Doctor omnis veritatis ac sapientiae Unice:
Te, inquam, Nomen Trinum, & unum unius
Dei Numen obnixè veneror, atque obtestor, uti
conatum nostrum difficilem plane, ac molestum
velis fortunare, uti Athenaeum hoc meo etiam
studio, ac industria indies convalescat: uti pro-
vincia erudiendi adolescentes, & ad probitatem
eruditionemque formandi, mihi commissà, huic
Urbi, civibus, eorumque liberis, sit fausta, felix,
ac fortunata, utique sub meis auspiciis & ductu
crescant nostrae disciplinae alumni in patriae &
Ecclesiae bonum, & decus. Illos incende libera-
lis ac salutaris doctrinae discendae cupiditate.
Serva ac tuere rempublicam, ut religio, libertas,
optimaeque artes florent aetatem.

Nunc vero cum apud animum meum reputem,
ac diligenter recenseam, quae mihi hodie publica
audio.

auctoritate persona fuerit imposita, cujusque rei causa locum hunc conscenderim, non alienum ab hac nobilissima concione, & his laetis auspiciis futurum existimo, si dixerō nonnulla de Scholarum dignitate, ac praestantia, eaque pro rei magnitudine breviter, ac summatim. Video plurimorum oculos & ora in me conversa, video vos admiratione defixos, avidis expectantes auribus, quid est, quod Scholas, quae vulgo ceu res viles, & tralaticiae habentur, laudare instituiam? Non ignoro, Auditores, ita quidem de Museis nostris inconsulte ac temere opinari non de faece plebis homines, & ex pullatis circulis, sed viros etiam haud vulgari excellentes doctrina. falluntur tamen illi vehementer. Quare insitam hanc & foedam opinionem, quae ad evertendum vitae humanae statum spectat, delere ex omnium animis constitui, & si per me fieri possit, penitus evellere. Dabo enim operam, pro mediocritate meae quantulaecunque in dicendo facultatis, ut cuncti cognoscant, & necessarias esse civitatibus Scholas, & utiles, & honestas, & prope divinas, neque minus de publica re bene mereri, qui Scholarum fines, quam qui imperii proferunt. De quibus rebus dum paucis disputo, peto a Vobis, Auditores, quaeſoque, ut eadem humanitate, eademque
qua

ORATIO INAUGURALIS.

qua caepistis attentione, verba mea audiat.

Ne autem lateat cuiquam, quid Scholarum nomine intelligamus, scitote, omnem nostrum sermonem futurum de iis locis, in quibus juvenilibus animis virtutis & officii praecepta proponuntur, ac lingua Graeca docetur & Romana. quibus tanquam initiis ac fundamentis firmissimis nititur omnis doctrina, omnis sapientia, & incolumitas totius generis humani. Magnam quidem vim, magnumque momentum aut ad beatam, aut ad miseram vitam educatio puerorum affert. Haec aut conservat, bonisque omnibus cumulat civitates, aut funditus evertit. ab hac salus interitusve totius reipublicae pendet. Quales enim nunc pueros habemus, tales paucos post annos cives sumus habituri. Ex his alii regunt rempublicam, alii reguntur, qui boni sunt futuri, & respublica felix, si recte vivendi praeceptis, & bonis artibus fuerint a teneris annis imbuti. Si qui tractant reipublicae gubernacula fuerint sanctissimi homines, summa pietate & prudentia praediti; qui vero parent probi, modesti, a factionibus & novis rebus alieni. Quod si perperam ac minus liberaliter fuerint alii, & instituti, ambitio, avaritia, luxus, libido, aliaeque vitae humanae pestes eos invadent, discentque haec
C
miseri

miseri ante etiam, quam scient esse vitia. pudor, abstinencia, virtus jacebunt, ac negligentur, resque publica miserandum in modum concutietur, prosternereturque. Omne malum nascens nullo negotio opprimitur, inveteratum fit plerumque robustius. fregeris citius id, quam flexeris, quod in pravam induruit consuetudinem. Si igitur adolescentes optime morati fiant, id primae aetatis custodibus potissimum est imputandum. innata enim naturae vitia, quibus animi pueriles contaminantur facillime, & ad quae illa aetas maxime prona est, sola institutione atque emendationi cura corriguntur. Ut bene maleve ponuntur initia, sic reliqua sequuntur. Sane magni refert apud quos, quo more, cujus arbitrato educati sint liberi. Nam ut unguentorum odores, quibus novae testae perfunduntur, non ad breve tempus durant, sic tenacissimi sumus earum rerum, quas rudibus annis percepimus. Rex fuit, & regum magnorum stirpe ac sanguine editus, Alexander Macedo, non tantum nomine, sed ingenuarum artium pariter ac rei militaris scientia Magnus. Is a Leonide, quo paedagogo fuit usus, vitiis quibusdam est infectus, quae cum semel combibisset, ita penitus in ejus mente infederunt, firmata etiam aetate, ut nullius unquam industria
ullo

ullo modo aut tempore potuerint extirpari, sed maximum Heroëm ab illa institutione puerili ad rogam usque fuerint prosequuta. Idem ille Macedonum rex, plus se debere Aristoteli, rectori iuventutis suae, ac sapientiae doctori, quam Patri Philippo, palam profiteri solebat. praefatus, ab hoc quidem & vitam se accepisse, & patrimonium, & regnum: verum ab illo rectis disciplinis fuisse institutum, edoctum optime, & ad omne officii genus instructum. quod maius est, quam regni potiri. Athenienses aliquando cupidi civitatem fundandi optimis legibus, oraculum ab Apolline Pythio petiverunt, sciscitantes quam viam inirent, ut compotes fierent votorum, & cives sui evaderent viri boni? Phoebus respondit, beatam fore rempublicam, si liberorum auribus appenderent rem omnium pretiosissimam. Illi inepte & non pro ingeniorum suorum acumine & sagacitate puerorum aures perfoderunt, & ornavit gemmis auroque, quod his rebus, inducti errore vulgi, nihil pretiosius putarent. quippe Apollinis sententia erat, inculcanda esse auribus puerorum pulcherrima monita sapientum, & scientiae cognitionisque studia, quibus indomitae ac effrenatae cupiditates coercerentur. iis enim nulla res pretiosior est, nulla praestantior. In bestiis etiam

vis haec melioris pejorisve educationis cernitur. id quod Lycurgus, qui Lacedaemoniorum rempublicam temperavit, festivo & eleganti exemplo civibus ostendit. Aluit duos catulos, iisdem ortos parentibus. venando erudiit alterum, alterum molliter domi habuit ac delicate. Cum adolevisent, utrumque in spectaculo publice exhibuit, iussitque ollam carnibus repletam apponi, & leporem emitti. derepente venaticus in leporem irruit, in ollam domesticus. Hinc cum eorum, a quibus nobilissimarum civitatum mores sunt constituti, tum gravissimorum virorum, quin & maximorum Imperatorum, ac Regum semper maxima fuit cura, ut liberi recte educarentur, instituerenturque, quod fieri nusquam potest, nisi in ludis litterariis. Sic Pompeji, Caesares, Augusti, Vespasiani, Antonini, Gratiani, & plures alii (tanto nomine Viri, tanta sui temporis reipublicae Lumina!) omnem industriam, & diligentiam ad tuendas Scholas, & conservandas contulerunt. Sic & Carolus Magnus per totum regnum ludos docendi aperuit, Viros elegantia ingenii, & vitae doctrinaeque praestantia in primis claros, quibus institutionem puerorum committeret, anxie exquisivit, eosque arcessivit praemiis amplis propositis, & cum discentium ingenia

pu-

ORATIO INAUGURALIS.

publice exercitarentur, semper fuit praesto. Contra ea Mytilenaei cum viderent tanti ponderis in republica Scholas esse, & litterarum studia, si quos populos armis subegissent, atque in suam redegissent ditionem, eorum liberos a litterarum cultu prohibebant, rati nulla eos graviore poena posse affici, neque facilius contineri in officio, effoeminarique, quam si eos liberalium disciplinarum fructu privarent. Julianus Imperator, qui quod a Christi militia, cui nomen dederat, impie desciverit, Apostata est appellatus, cum nefaria consilia de evertenda Christiana religione & stirpitus eradicanda cepisset, non alio modo se id consequuturum credidit, quam si omnium Christianorum Scholas occludi juberet, neque eorum liberos ad Scholas gentilium admitti pateretur. Nec immerito. Scholis enim sublati tollitur e vita omnis humanitas, tenebrae, barbaries, & immanitas Schytica omnia profana, omnia sacra occupabit. Orpheum veteres memoriae prodiderunt, rapidos leones, saevasque tigres fidi-
bus leniisse, ac omne duxisse avium genus, neque tantum feras domuisse, & volucres, sed & saxa quoque, & sylvas molli cantu movisse, & fluviorum inhibuisse cursum; non alia ratione, quam quod institutione pereleganti inconditorum ac

C 3

rudium¹

rudium mortalium perniciosos errores emendaverit, iis exposuerit, quanta sit in virtute pulchritudo, quanta in vitiis deformitas, tradiderit recte vivendi vias, hominum genus in montibus, ac sylvis dispersum convocaverit in vitae societatem, eosque inter se primo domiciliis, deinde conjugii, tum litterarum & vocum communione conjunxerit, copulaveritque. Quis ignorat, antiquissimos Britannorum barbaros fuisse, ac ferocissimos homines? postea vero quam ab iis cujuscunque disciplinae scientiae coeperunt coli, quid hac insula mitius, quid elegantius, quid urbanius? quid urbium amplitudine, splendore aedificiorum magnificentius: cujus populi erga Deum pietas major? Quid est, quod in ulla fortunata regione laudari potest, quod illic desideretur? Quid Majores nostros commemorem? antequam Scholae excitabantur, nondum inducto bonarum artium cultu, quae gens fuit? quae natio? qui mores? quae instituta? fortes quidem erant, & bellicosi, sed inculti, agrestes, immanes. vita omnis in venationibus, atque in cura armorum consistebat. terra ipsa aut sylvis horrida erat, aut paludibus foeda. neque urbes habebant, neque leges, neque certam reipublicae formam. Litterarum autem & sapientiae tractatio nos ab
illa

illa fera agrestique vita ad hunc humanum cultum civilemque traduxit. Beatissima enim haec terrae plaga nunc omnibus copiis, atque omnium rerum abundantia ad facile beateque vivendum circumfluit. Incolarum comitate, affabilitate sermonis, ac morum elegantia nihil illustrius est, nihil benignius, ut exterarum nationes in sui admirationem rapiant, ac sale & lepore suo pelliciant in sui amorem. Virorum varia eruditione excellentium feracissimo floret proventu. Benignitas coeli, soli laetitia, salubritas, amoenitas tanta, ut nihil neque usu uberius, neque specie ornatius esse possit. Sive ornatissimarum urbium magnitudinem, multitudinemque, ubi omnia mirifice nitent, ubi oculis, quocunque eos vertas, nihil propemodum, nisi politum & elegans occurrit; sive rei militaris virtutem, sive ductandorum exercituum, castrorumque locandorum peritiam, sive curam optimarum legum ac judiciorum, sive rei publicae domi forisque gerendae rationem, sive artium varietatem consideres, his omnibus, & innumeris aliis dotibus, quibus respublica censeatur, nostri reliquis gentibus aut pares sunt, aut superiores. Quin haec ipsa Urbs, foederatae Belgicae ocellus, quod vigeat, quod fortunata, quod ampla, quod ingenio & opere munita sit; quod

situ

fitu & descriptione aedificiorum, & pulchritudine in primis prae aliis emineat; quod abundet rebus omnibus ad vitae jucunditatem, facilitatemque necessariis; quod referta sit incolis, & indigenis, quos non magis natalium splendor, & plena imaginum antiquarum atria, quam morum decor & lauitia exornat; quod ei praesint, & jam pridem praefuerint Viri aut admiranda animi magnitudine, aut insigni doctrina & sapientia, aut utraque re ornati, ac sempiterna laude dignissimi, qui illam tanta constantia, tanta moderatione, tantaque prudentia regunt, ut mentes cunctorum perstringant, ac stupore defigant; quod propterea nobilissima obsidione, qua eam ante tres & viginti admodum annos acerrimi & potentissimi hostes maximis & invictis exercitibus constrictam tenebant, tam feliciter fuerit liberata, cum jam tres populi, juncti foedere, a nobis vi hostili essent avulsi, nec tantum omnis vicinia tremere, & patria nostra a nemine non conclamata haberetur, verum etiam atrocissima illa tempestate tota concuteretur Europa: Id omne litterarum disciplinae acceptum est referendum. Sed nimium multa fortasse de re minime dubia loquor. Haec enim nota sunt & testata, atque in omnium incurrunt oculos.

Ut

Ut autem elegantiae, ac vitae cultioris magistra est Schola nostra, sic & omnium artium ac sapientiae parens, altrix, conservatrix. Quicquid litterarum in omni orbis tractu hinc inde aut viget, aut succrescit, Scholae debetur. Non enim angustis terminis circumscribitur usus ejus ac utilitas, sed ea tam late patet, quam lati sunt fines rerum humanarum, & ad omne vitae genus sese extendit. Proponamus nobis omnes aetatis humanae partes ac gradus, omnes publicorum temporum distinctiones ac dissimilitudines, omnes conditiones rationesque vivendi, atque ea, quae oculis non possumus, animo ac cogitatione contemplemur; videbimus Scholas ad ea omnia, tanquam uberrimos fontes, rivulos suos salubres mittere, eaque & adjuvare plurimum, & incredibiliter illustrare. Nihil nunc dicam de humilibus artibus, quarum omne opus est in faciendo & agendo, de agricultura, de navigatione, & ceteris pluribus. Nihil de iis, quae ad liberales proxime accedunt, de pictura, statuaria, architectura, de artibus fingendi scalpendique, in quibus non tantum utilitas quaeritur mirabilis, sed & animi haud mediocris oblectatio. quantum illarum cultores inter reliquos semper excelluerunt, quando in nostra officina, limati prius fue-

D

rant

rant ac politi! Constans enim inter omnes auctores opinio est, cunctas artes tam arcta quasi cognatione, & indissolubili vinculo cum Musis copulari ac conjungi, ut iis viventibus ac florentibus, floruerint ac enituerint artes, oppressis vero & extinctis litteris, penitus jacuerint demersae ac prostratae, nec ante potuerint recreari ac se erigere, quam eadem litterae reviviscerent, ac rursus extollerent caput. Mitto, quod parit Schola, & tanquam foetus multiplices edit frugi & attentos patresfamilias, obsequentes cives & patriae amantes, probos & singulari integritate mercatores, claros atque excellentes historicos, sine quibus nulli non pueri sunt, divinos ac ingeniosos Poëtas, quorum suavissimis cantibus coelum ac terra personat, disertos ac eloquentes oratores; qui ore rotundo, ac celeri canoraque lingua, ceu habenis quibusdam, audientium animos pro arbitrio flectunt, atque contorquent. Magna haec, & utilia, quis ibit inficias? Sed ad majora properat oratio. Ex Schola enim, tanquam ex equo Trojano, prodeunt fortes ac constantissimi Imperatores, qui dies noctesque excubant pro aris & focis contra insultus hostiles; qui invicta manu ac consilii magnitudine gravissimas injurias a patria propulsant. Prodeunt

deunt periti ac diligentes Medici, qui avertunt pestilentiam, morbosque ingravescentes exquisita ratione provident; qui omnes suas curas, omnes cogitationes conferunt in salutem ac vitam nostram. Prodeunt virtutis magistri, acutissimi Philosophi, qui in magna rerum obscuritate, ac in arte retrusa subtilique versantur; qui coeli immensa spatia; ac solis siderumque situs, magnitudines, intervalla dimetiuntur; qui mundi originem, abditas naturae causas, & rerum rimantur initia; qui omnia divina atque humana explorant; qui radicem vitiorum omnium extrahunt stirpitus; qui disciplinam officii excolendi, rei publicae componendae viam tenent ac persequuntur. Prodeunt sanctissimi Legumlatores, qui scribunt leges, quibus recta & honesta jubentur, vetantur prava & turpia: Leges, quibus supplicio afficiuntur improbi, & boni defenduntur: Leges, sine quibus nec societas ulla, nec civitas, nec populus, nec universum genus humanum consistere, nec rerum natura omnis, nec ipse mundus potest. Prodeunt honestissimi ac praestantissimi Senatores, qui consilio & prudentia rempublicam regunt, propugnant, tutantur. Prodeunt integerrimi Iudices, qui summa religione, & pari severitate, & acquabiliter, & laboriosissime Jura

litigantibus reddunt. Prodeunt solertes Legum Jurisque consulti, boni & aequi sacerdotes, qui civium inter se lites ac dissidia sedate componunt; qui pro infontibus causas orant; quibus exploratum est, quid suum sit, quidve alienum, quantumve tribui cuique oporteat; quorum domus est totius civitatis oraculum, quod irreprehensa dat populo responsa petenti. Prodeunt prudentes rerumpublicarum Moderatores, quibus, sicut gubernatoribus cursus secundus, fortunata civium vita est proposita, ut opibus firma sit ac munita, copiis locuples ac abundans, gloria ampla ac illustris, virtute honesta ac honorata. Prodeunt denique casti ac probatae pietatis ecclesiae Doctores, caeremoniarum ac Sacrorum Antistites, qui arcanam Dei immortalis voluntatem interpretantur, & veram ejus colendi edocent rationem; qui improbos a pravitate vitae revocant ad virtutem & scelerum expiationem; qui beatæ vitae inexhaustos thesauros pandunt recluduntque, & tanquam in statione positi, pro salute populi Christiani noctu ac interdiu vigilant adversus occultas malorum insidias. Sed dies, & vox, & vires me deficerent, si omnes, qui ex hac virtutis & doctrinae officina meliores prodeunt vellem enumerare.

Cum

Cum igitur certissimum sit, ex immortalibus Graeciae Latiique monumentis, quasi ex sanctis & vulgo ignotis fontibus, omnia studia omnemque humanitatem in vitam hominum profluere, dubium nullum est, quin sponte nunc omnes intelligatis, has artes, exercitationesque virtutum, quas longa serie recensui, tanta ac tam divina munera! has artes, inquam, sine Graecanicarum Latinarumque litterarum cognitione, atque adeo sine Scholarum usu, in quibus harum artium fundamenta jaciuntur, nec recte, nec feliciter posse institui, aut conservari, haud secus, ac si quis sine navigio mare vastissimum vellet transire. Id qui negant, aut, quid verum sit, non vident, aut contendendi tanto studio tenentur, ut etiam ea, quae verissima sunt, impugnare non vereantur, habeanturque indigni, quibus exquisitis argumentis respondeamus. Quamvis enim intelligendi sapiendique facultas a natura nobis sit indita; vires tamen suas illa exercere non potest, nisi animus praeclararum rerum studio excolatur: velut aurum & argentum, quamdiu in venis suis est reconditum, & luto adhaerescit, nullum habet usum, nisi e fodinis eruatur manu & industria hominum, & faecibus purgetur. At quis ab omni memoria tanta ubertate ingenii, tantaque dicendi

D 3

copia

copia fuerit praeditus, qui commoda, & utilitatem, quam ex ludis percipit orbis universus, aptis verbis exponere possit, & ornando amplificare?

Licet autem non minor dignitas in Scholarum cura, quam utilitas vertatur, vulgus tamen, & rerum eximiarum imperiti, nescio qui terrae filii, qui splendore ducuntur, & specie ista, quae oculos ferit, inique ac corrupte de iis judicant, existimantque non tam veritatis amore, quam odio in litteras ac malitia impulsu, rem tenuem esse & abjectam, in ludis litterariis tempus & aetatem consumere, plane ut Musis, earumque patronis bellum indixisse videantur, nisi eos forsitan hebetiores natura finxerit stolidioresque quam ut perspicere possint hujus rei praestantiam ac claritatem. Aliter senserunt viri illustres incredibili sapientia, & auctoritate graves. Hi docendi munera inter maxima & honestissima totius rei-publicae semper habuerunt, eosque, qui illisungebantur, in summum locum, atque celsissimam dignitatis, honoris, ac gloriae sedem collocarunt; causati non parvis contemnendisque rebus occupari, sed eos neque ampliorem operam, neque salubriorem patriae navare posse putabant. quippe qui non unius tantum, aut paucorum hominum, sed

sed omnium, sed publicae consulebant utilitati ac saluti. Possem hoc infinitis ostendere exemplis, nisi & temporis ratio, & vestra patientia me brevem esse hortarentur. Sententia igitur in primis M. Tullii, doctissimi Romanorum, erit nobis instar plurium. Qui cum omne tempus suum amicorum temporibus transmisisset: cum a privatorum cervicibus pericula saepius avertisset non sine sui capitis atque vitae discrimine: Cum tot jacentes & afflictos cives erexisset suis factis atque consiliis, perditosque recreasset: cum homo novus per omnes honorum gradus ascendisset ad summum fastigium dignitatis, consulatum urbis Romae, in tanta nobilissimorum hominum multitudine, omnesque gessisset magistratus immortalis cum gloria: cum clarissimum illud orbis terrae imperium, domicilium virtutis, sedem omnium gentium eripuisset ex ore ac faucibus conjuratorum, qui pestem ei nefarie moliebantur, iisque, qui civium interitum adornabant ac perniciem, impia & scelerata arma excussisset e manibus: cum Proconsul provinciam foenore exinanitam sublevasset, ac integritate sua, continentia, moderatione pristinum ei reddidisset statum ac formam, hostibus, qui eam infestabant, fufis fugatisque: denique cum se, fortunasque suas, cum vitam omnem, & spiritum quoque, & animam pro reipublicae salute ac

inco-

incolumitate devovisset, ut Senatu consentiente cum populo Romano a Quinto Catulo PARENS PATRIAE fuerit consalutatus: Is tamen talis ac tantus Vir liquido & audacter affirmat: *Neminem posse munus rei publicae afferre majus, meliusve, quam si doceat, atque erudiat juventutem, his praesertim moribus, atque temporibus, quibus ita prolapsa est, ut omnium opibus refrænanda sit, atque coërcenda.* Quid agis M. Tulli? rectene intellexisti verba, quae effundis? inconsideratene loqueris? Quid? adolescentes docere praestat, quam reos innoxios squalore sordibusque, patriam incendiis & direptionibus, interitu & exitio rempublicam, caedibus & internecione cives, vastitate & ruinis provinciam liberare? Audesne erudiendi munus Quaesturae, Aedilitati, Praeturae, Consulatus (tantis dignitatibus!) praeferre? Non audet tantum haec palam ac magna voce pronunciare, Auditores, sed quod majori admiratione dignum est, ausus est & verba rebus confirmare, ausus est jam senex, jam praefulgens omni honore ac majestate, ipsemet familiaribus Scholam aperire: persuasum enim habebat vir divinus, & in posteritatis exemplum natus, rempublicam nullam esse, si desiderarentur Viri, liberali doctrina perpoliti, apud quos juvenes moribus, disciplinisque ingenuis tingerentur. En igitur honestatis dignitatisque maximae acroama venissimum

ORATIO INAUGURALIS. 11

num ac conspicuum, quod calumniantibus, ac Scholarum os possit obstruere. Eadem fuit sententia Socratis, principis Philosophorum, qui ab ipso Apolline dictus est omnium sapientissimus. hic interrogantibus, cur nullis rationibus, nullis praemiis posset incitari ad rempublicam capeffendam, quum ejus gerendae prae ceteris esset peritissimus? respondisse fertur: Multo majorem utilitatem cum adferre civitati, qui plures redderet idoneos ad tractandam rempublicam, quam qui illam summa prudentia tractaret. Sed videor mihi audire reponentium susurrationses, non de puerili institutione ac trivialis scientiae magistris loqui Ciceronem, Socratemque, verum de altiorum ac praeclararum rerum doctoribus. Non inficior. Eos tamen nostri quoque ordinis & loci homines, nostrasque curas, tanquam omnium studiorum fundamenta, & hac sententia complecti, dubitandum non est: nam in Scholis nostris prima pueritiae rudimenta sunt deponenda, ac jacienda quarumlibet scientiarum fundamenta necessaria. qui vero illis neglectis majori alicui disciplinae se dediderunt, nunquam ad bonam frugem pervenient, neque exiniarum rerum atque artium cognitionem assequuntur; sed oleum & operam perinde erunt perdituri, ac si cum effoeta muliere in

E

spem

spem prolis consueſcerent. Fluctuant enim humana omnia, quae non ſunt in ſedibus illis, & quaſi fundamentis, conſtituta. Hinc in bene ordinatis & florentiſſimis rebus publicis ipſi Viri ſummi, qui magiſtratus ſummos geſſerant, ac principem in civitate locum tenebant, praecipendi munus ſuſtinuerunt. Minos Cretenſium, Lycurgus Lacedaemoniorum, Hipparchus Athenienſium praefuit & publicae rei, & Scholaſticae. Romae pueri praetexta depoſita deducebantur a parentibus vel neceſſariis ad Viros, qui dignitate & laudatarum artium doctrina prae ceteris eminebant, ut ab illis optime formarentur, revocarenturque a luxuria atque libidine, ab otii atque intemperantiae vitiis, nec non aſſiduis cohortationibus incitarentur ad humanitatis ſtudium, & ad laborem in negotiis, cum publicis, tum privatis, fortiter ferendum: circa hos perpetuo verſabantur adoleſcentuli, hos ſectabantur, hos proſequebantur ubique. In republica Laconica itidem praeficiebantur educationi tam puellarum, quam puerorum, viri magiſtratibus maximis & imperiis perfuncti, qui has docebant pudicitiam, & temperatos, moderatosque mores, illos modeſtiam, reverentiam majorum, & litteras elegantiores: omnibus vero acquibonique amorem, &, velut genitricem virtutum, fru-

frugalitatem ingerebant. Hebraeorum liberi liberaliter educatione doctrinaque puerili instituebantur a Prophetis. Inde toties in sacris litteris Prophetarum discipuli & Scholae aperte laudantur. Helium sacerdotem audivit Samuel. Singuli quoque Apostoli in ludis exercuerunt juventutem, ac in moribus eorum corruptis emendandis elaborarunt. Joannes, qui primus homines salutaribus tinxit aquis, & inde vulgo Baptistae cognomen invenit, docendi genere magnopere inclaruit. Gamalielis Paulus, Pauli Timotheus fuit auditor. Quin & Christus Jesus, Rex regum, ac orbis Sospitator, magistri personam suscepit, habuitque discipulos selectos, quos separatim ac diligentissime erudiit. Sed nescio, me quis aestus de dignitate dicentem longius fortasse, quam par erat, abripuit. Tantus enim honor iis, qui litteras docent, tribuatur necesse est, quantus ipsis litteris tribui solet, utpote quae sine illis nullius sunt usus, pretii nullius, nullius existimationis.

Quis nunc erit homo oris tam ferrei, quis animo tam agresti ac duro, qui ausit & necessitatem, & utilitatem Scholarum, & dignitatem in incertum dubiumque revocare? Scholarum beneficio pueritia & adolescentia egregie educatur, sanctissimisque instruitur disciplinis. Scholarum be-

beneficio aetas senilis traducitur quiete, placide, splendide. Scholarum beneficio tractantur gubernacula reipublicae. Scholarum beneficio regna administrantur. Scholarum beneficio verus Deus religione vera, quae maximum humani generis pignus est, colitur. Scholarum beneficio viae, & apertae, & simplices, & directae, traduntur, per quas veluti albis quadrigis vehimur, & ascendimus in coelum. Quid multis? Scholarum beneficio totus terrarum orbis regitur atque gubernatur. Bonae mentis palaestra sunt Scholae, fundamentum ecclesiae, seminarium reipublicae, pietatis, modestiae, humanitatis, & doctrinae quasi templum, ac sacrarium. quas qui contemnendas putat, is vincula convellit non modo litterarum humaniorum, verum etiam utilitatis publicae vitaeque communis. Sed contrahenda sunt vela hujus navis, remis inhibendum est, eaque subducenda, ne in altum provecta longius portum non inveniatur.

Pleniori autem ore laudanda est, & in coelum jure ac vere ferenda Amplissimi hujus Urbis Senatus prolixa in liberalium artium Doctores voluntas, & incredibilis munificentia in Scholam tuendam, ac sartam tectam conservandam. Fidem omnem superat, quantae curae Illis sit eruditio & omnium rerum scientia; quam faveant ingeniorum
rum

rum culturae, quanta vigilantia, quanta diligentia, quanta animi magnitudine collapsas dejectasque res litterarias & Scholasticas restituant. Id quod non ita pridem Inculcentissimis argumentis declararunt nostri Proceres. Nam cum acerbis & immatura morte doctissimi ac celeberrimi Decessoris mei, VESALII MOBACHII, hic locus vacuus esset factus, cumque illius desiderium aequo animo nemo posset ferre, lugerent Collegae, moererent discipuli, atque ipsa cathedra ob interitum Praesidis sui desideratissimi squaleret, ac ingenti quasi convicio Amplissimorum Patrum auxilium imploraret, flagitaretque, ut sanaretur plaga sibi imposita, & gravis haec jactura refarciretur; tam anxie, tam sollicitè, tantaque providentia ubique circumspexerunt, ac perquisiverunt varias urbes, varias regiones, a nobis longe remotas, invenirentne quemdam, qui boni Doctoris numeros posset implere, nullis parcentes laboribus, nullis sumptibus, adeo ut nihil fieri potuerit illustrius, nihil accuratius. Neque haec commemoro, Auditores, jactandi gratia, quoniam ipse potissimum fui ad hoc munus electus (absit invidia dictis. nemo enim profecto & natura & ratione alienior est ab omni vanitate, & inani laude, quae mihi gloria videtur miserrima, quam ego sum. quin & agnosco meam

ingenii imbecillitatem, neque mihi unquam soleo blandiri, aliis semper tribuo plurimum) verum ut meo etiam praeconio testatum omnibus facerem Amplissimi Senatus effusum studium & infinitam benignitatem erga carissimam hanc Illius Filiam. cujus rei memoriam nulla unquam delebit oblivio, neque ullo tempore de ea hominum gratissimus sermo conticescet. Vellem nunc, Auditores, tantam in me esse vim & facultatem dicendi, ut immortale hoc Gravissimorum Patrum erga litteras & totam civitatem beneficium, pro rei dignitate, ornare & in astra tollere possem. Nihil enim magis ad tutelam felicitatis publicae confert, quam honestarum artium scientiam & liberales disciplinas florere quam maxime. Laetemur igitur, ac communi studiorum nomine gaudemus & singuli, & universi. Gaudete litterarum & Musarum amantes, quod ea in dignatione & pretio summo haberi cernitis, quae Vobis sunt in deliciis. Gaudete Musae (o dulces!) ante omnia Gaudete, quod tales Custodes nactae estis, qui non minorem vestrarum, quam publicae rei curam gerunt. Gaudete Cives, quod liberi vestri domi, in vestro sinu ac contubernio, doctrinae ac sapientiae tyrocinia ponere possunt, & in natali solo sub oculis vestris adolefcere, quo nihil parenti-

rentibus jucundius est, nihil honestius, nihil gratius. Gaudete vos in primis studiosi Juvenes, Gaudete chara Capita, Gaudete, quod haec discendi occasio vobis datur, & tantum tribuitur beneficium. Vestra enim res agitur. Agnoscite per Deum immortalem tantum munus, quod vobis offertur, atque illo fruimini. Patriae Parentibus pro singulari erga vos beneficentia ac bonitate gratiam referte maximam, incredibilem, immortalem. Gratiam autem referetis, si vobis ipsimet non defueritis, neque vos privaveritis hujus beneficentiae fructu. Si summa ope incubueritis in litterarum studia, in iisque imbibendis tempus omne consumpseritis. Omnia alia fallacia sunt, caduca, fragilia, lubrica. eruditio est una altissimis defixa radicibus, quae non tantum propagatur continuo, sed & nunquam ulla vi labefactari potest, nunquam dimoveri ex sua sede & statu, nunquam depelli de loco. Ad hanc adspirate mirifica vigilantia pleni. ad hanc omnibus viribus contendite, si famae vos, si gloriae, si dignitatis quaedam cura tetigerit. Fugite desidiam, languorem, inertiam, &, tanquam infestissimos animorum scopulos, declinate. Aptae est aetas ad varios corporis labores perferendos. Patet trita via. Me ducem, aut potius comitem, habete assiduam & diligentem.

Equi-

Equidem quantum opera, vigiliis, auctoritate, consilio efficere potero, nihil praetermittam, quod ad incrementa & processus vestros pertinere arbitror. Docebo, admonebo, instabo, urgebo, excitabo, aliquando etiam, si res ita flagitabit, objurgabo, increpabo, castigabo. Neque enim vobis blandiar. Contemnam vos, si vos litteras contempseritis. sin autem amaveritis eas, amabo quoque & vos, & vestra commoda mirum in modum.

Vobis vero, Consules ac Senatores Potentissimi, quibus verbis gratias agam, quod tam ample, tam benigne, tam honeste de me sensistis, ut mihi praecipue hanc provinciam credere ornandam, & ad claram hanc ac honoratam stationem cunctis suffragiis evehere volueritis? Tantum enim in me amorem Vestrum, tantamque benevolentiam, qua me estis complexi cum maxime, silentio praeterire non possum. Quid habeo nunc aliud optare, Patres Amplissimi, quam ut hanc, quam de me concitastis opinionem, sic, ut oportet, tueri queam, utque indies vehementius Vos de me ita statuissetis laetemini? Intellego enim, quantum onus sustineam, quantum mihi omni studio & officio, omni ope & opera sit enitendum, ne Vestrae Vos unquam honorificae sententiae quam de me habuistis, poeni-

poeniteat. Ne Vos autem illius poeniteat, nullum tempus a me dimittetur, neque diurnum, neque nocturnum, quin de ingenuorum juvenum, qui hanc Musarum aedem celebrabunt, commodis atque profectibus, quod cogitandum sit, cogitem, quod faciendum, atque praestandum, id non modo non defugiam, abnuamve, sed appetam etiam atque ultro deposcam. In his enim mihi omnia constituta esse decrevi. Nihil a me, pro Vestra singulari humanitate ac sapientia, exigitis spero, cui humeri lacertique mei ferendo non fuerint pares, in primis si perspectum plane, ac exploratum habueritis, me nullam nec corporis unquam, nec animi contentionem recusaturum, unde aliquam haec Schola utilitatem atque emolumentum poterit percipere. Neque enim dubito, quin omni cultu, & summa, qua Vobis devotus sum, observantia, nec non perpetuo obsequio erga Vos, studio vero ac sedulitate in fingendis & erudiendis Vestris, Vestrorumque civium liberis facile & Vobis, & ceteris omnibus sim satisfactorius, quamvis mihi ipse satisfacere nunquam potuero. Ea mihi utique curarum omnium antiquissima est futura, ne Vestram, qui me delegitis, expectationem prorsus fallam, ac destituam. Haec verba velim existimetis foederis vim esse habitura,

E non

non orationis, meque ea, quae Vobis pollicor ac recipio, constantissime esse observaturum, diligentissimeque facturum.

Vos nunc appello, Praeceptores ornatissimi, Collegae honorandi (ad Vos mea tandem declinat oratio) recipite me eadem voluntate, eodemque amore, quo me ad vos vocavit Amplissimus Senatus. Meam amicitiam, meam benignitatem, meum officium vobis bona fide promitto, & defero. Non me superiorem, sed parem cognoscetis. Colite concordiam, colite pacem, sine qua nec publicae res, nec privatae bene geri possunt: atque huic uni curae estote intenti, ut virtute, probitate, bonis moribus, Graecae Latinaeque Linguae cognitione, & arte bene dicendi, quae divinas humanasque scientias illustrat, juvenes instruantur. Illa enim praecipue in Scholis nostris sunt docenda. Aliae disciplinae graviores, de causis rerum naturalium, de morali & civili doctrina, de arte differendi, quae Logica vulgo vocatur, & si quae similes, quae superant captum adolescentium, nostrae fidei creditorum, reservandae sunt Scholis aliis sublimioribus, ubi haec, cum ingenia ad ea intelligenda maturuerint, ratione illa, & via, qua decet, traduntur. Nam si in nostris Scholis hae artes accurate & utiliter possent tractari, ac percipi gustus

stus quarumvis partium studii sapientiae, inutiles
 forent Academiae, supervacanei Professores, in
 quorum tamen tutelam infinitos sumptus, & vix
 magnis Regibus ferendos, liberalissime impendunt
 Summi Magistratus. In institutione igitur artium
 ac scientiarum per gradus ascendere debemus, &
 progredi ordine recto. Non inchoandum a mediis,
 non haerendum in primis est: ab his ad illa pro-
 cedere, & inde niti in summa oportet. Qui enim
 per ambages & flexus devios praeposteris & evi-
 tandis itineribus incedit, perinde decipitur, ac
 si quis amnes non ab ipsis fontium primordiis de-
 rivare, sed coactis jam, & concretis aquarum mo-
 libus avertere, & exsiccare velit. Aptanda sunt
 quoque viribus onera, nec plura occupanda, quam
 quibus sufficere possumus. Non quantum volu-
 mus, sed quantum capimus, hauriendum. Haec
 mea est sententia. Scio, alios aliter sentire. Nam
 ut palatorum, ita & sententiarum magna est di-
 versitas. Ne Jovem quidem ipsum (vetus verbum
 est) omnibus placere posse, sive pluat, sive vultu
 rideat sereno. Praeclare ageretur cum rebus hu-
 manis, si cunctis meliora probarentur. Verunta-
 men, quicquid e re Scholarum esse visum fuerit
 Amplissimis & Prudentissimis Viris, quorum
 nutu atque auctoritate omnium studia nostra dis-

F 2

ponun-

ponuntur, id optimum nobis est ducendum. Illorum arbitria nobis pro legibus sunt. Ad hanc itaque doctrinam vobis, Deo propitio, ac volente, viam praeibo. nullus dubito, quin strenue, uti soletis, sitis subsequuturi, ut opinioni & munificentiae Amplissimi Senatus nostra omnium respondeat industria, diligentia, & fructus, ut nostra Schola pristinum suum decus & splendorem, quo floruit dudum, retineat, utque tantum supra ceteras sit caput elatura, quantum lenta solet inter viburna cupressus.

D I X I



ODE

O D E
In Orationem Cultissimam
PRO SCHOLIS,
HABITAM AB EXIMIO, DOCTIS-
SIMOQUE VIRO,
JOANNE GREVIO,
SWOLLANO,
I. U. D.

Cum Provinciam muneris delati, Praefecturam
SCHOLARUM GRONINGANARUM,
AB INITIALI ORATIONE,

Praesente lectissima omnis Ordinis corona, applaudentibus
cunctis, feliciter esset auspicatus.

A Ureo fandi modo quae lepore
Suada nativis decorata gemmis
Traxit attentam modulata culto
Ore coronam,

Prodit in lucem Procerum rogatu,
Ut sequi pubes animosa discat
Rhetorem, docto modo quem tonantem
Ore stupebat.

Quae

Quae tulit plausus, animi benigni
Indices, laxis animata frenis,
Et sitim fecit, simul & levavit
 Ubere vena,

Lecta nil perdet decoris venusti,
Lecta nil cultus numerosioris,
Absit his quamvis numeris benignae
 Gratia vocis.

Illa dos oris bene copiosi,
Illa dos mentis bene perpolitae,
Viribus mentes studiosa cepit
 Non novitate.

Flore conscriptus viridis juventae
Ingeni cultus brevis hic libellus
Fertiles spondet locuplete cornu
 Messis honores.

Lege qua fecit celebres severa
Rite progressus, pariterque crevit,
Maximo doctus Duce, finget ora
 Pubis honestae,

Ceream flecti, docilemque ducet
Indolem, qua fert Pietas, Pudorque,
Lacta qua Virtus comitata pulchro
 Laudis amore,

Unde

Unde proventus , hilarata multum
Uberes sperent fora , templa , fasces ,
Unde Mularum celebrentur aedes
Agmine denso.

J O H: M E N S I N G A ;

Eloquentiae , & Historiarum
Professor.



